

四庫全書

史部

欽定四庫全書

唐書卷二十三下

宋 翰 林 學 士 歐 陽 修 撰

志第十三下

儀衛

太皇太后皇太后皇后出尚儀版奏請中嚴尚服率司
仗布侍衛司賓列內命婦於庭西嚮北上六尚以下詣
室奉迎尚服負寶內僕進車于閣外尚儀版奏外辦馭

者執轡太皇太后乘輿以出華蓋侍衛警蹕內命婦從出門太皇太后升車從官皆乘馬內命婦宮人以次從清游隊旗一執者一人佩橫刀引夾皆二人佩弓箭橫刀騎次金吾衛折衝都尉一人佩橫刀弓箭領騎四十亦佩橫刀夾折衝執稍二十人持弩四人佩弓箭十六人持驟稍刀二人次虞候飲飛二十八人騎佩弓箭橫刀夾道分左右以屬黃麾仗次內僕令一人在左丞一人在右各書令史二人騎從次黃麾一執者一人夾道

二人皆騎次左右廂黃麾仗廂皆三行行百人第一短
戟五色氅執者黃地白花綦襖冒第二戈五色氅執者
赤地黃花綦襖冒第三鎗五色旛執者青地赤花綦襖
冒左右衛左右威衛左右武衛左右驍衛左右領軍衛
各三行行二十人每衛以主帥六人主之皆豹文袍冒
執鍬石裝長刀騎唯左右領軍衛減三人每衛果毅都
尉一人被繡袍各一人從左右領軍衛有絳引幡引前
者三掩後者三次內謁者監四人給事二人內常侍二

人內侍少監二人騎分左右皆有內給使一人從次內
給使百二十人平巾幘大口絳緋襖襠分左右屬于宮
人車次偏扇團扇方扇皆二十四宮人執之衣綵大襖
裙襦綵衣革帶履分左右次香蹬一內給使四人輦之
居重翟車前次重翟車駕四馬駕士二十四人次行障
六次坐障三皆左右夾車宮人執之服同執扇次內寺
伯二人領寺人六人執御刀服如內給使夾重翟車次
腰輦一執者八人團雉尾扇二夾輦次大繖四次雉尾

扇八左右橫行為二重次錦花蓋二單行次小雉尾扇
朱畫團扇皆十二橫行次錦曲蓋二十橫行為二重次
錦六柱八分左右自腰舉以下皆內給使執之次宮人
車次絳麾二分左右次後黃麾一執者一人夾二人皆
騎次供奉宮人在黃麾後次厭翟車翟車安車皆駕四
馬駕士各二十四人四望車駕士二十二人金根車駕
牛駕士十二人次左右廂衙門各二每門二人執四人
夾皆赤綦褱黃袍冒騎次左右領軍衛廂皆一百五十

人執爿赤地黃花綦襖冒前屬于黃麾仗後盡鹵簿廂
各主帥四人主之皆黃袍冒執鍬石裝長刀騎折衝都
尉二人檢校爿仗皆一人騎從次衙門一盡鹵簿後爿
仗內正道每門監門校尉二人主之執銀裝長刀廂各
有校尉一人騎佩銀橫刀往來檢校御馬減大駕之半
太皇太后將還三嚴內典引引外命婦出次就位司賓
引內命婦出次序立大次之前既外辦馭者執轡太皇
太后乘輿出次華蓋警蹕侍衛如初內命婦以下乘車

以從車駕入內典引引外命婦退駕至正殿門外車駕
南嚮尚儀前奏請降車將士還皇太子出則鹵簿陳于
重明門外其日三刻宮臣皆集於次左庶子版奏請中
嚴典謁引宮臣就位侍衛官服其器服左庶子負璽詣
閤奉迎僕進車若輦于西閤外南嚮內率一人執刀立
車前北嚮中允一人立侍臣之前贊者二人立中允之
前前二刻諸衛之官詣閤奉迎宮臣應從者各出次立
於門外文東武西重行北嚮北上左庶子版奏外辦僕

升正位執轡皇太子乘輿而出內率前執轡皇太子升車僕立授綏左庶子以下夾侍中允奏請發車動贊者夾引而出內率夾車而趨出重明門中允奏請停車侍臣上馬左庶子前承令退稱令曰諾中允退稱侍臣上馬贊者承侍臣皆騎中允奏請車右升左庶子前承令退稱令曰諾內率升訖中允奏請發車動鼓吹振作太傅乘車訓導少傅乘車訓從出延喜門家令先導次率更令詹事太保太傅太師皆輅車備鹵簿次清游隊

旗一執者一人佩橫刀引夾皆二人亦佩弓箭橫刀騎
次清道率府折衝都尉一人佩弓箭橫刀領騎三十亦
佩橫刀十八人執稍九人挾弓箭三人持弩各二人騎
從次左右清道率府率各一人騎佩橫刀弓箭領清道
直盪及檢校清游隊各二人執褭稍騎從次外清道直
盪二十四人騎佩弓箭橫刀夾道次龍旗六各一人騎
執佩橫刀戎服大袍橫行正道每旗前後二人騎為二
重前引後護皆佩弓箭橫刀戎服大袍次副竿二分左

右各一人騎執次細引六重皆騎佩橫刀每重二人自龍旗後屬于細仗稍弓箭相間廂各果毅都尉一人主之次率更丞一人府史二人騎從領鼓吹次誕馬十分左右執者各二人次廐牧令一人居左丞一人居右各府史二人騎從次左右翊府郎將二人主班劔次左右翊衛二十四人執班劔分左右次通事舍人四人司直二人文學四人洗馬二人司議郎二人居左太子舍人二人居右中允二人居左中舍人二人居右左右諭德

二人左右庶子四人騎分左右皆一人從次左右衛率
府副率二人步從次親勳翊衛廂各中郎將郎將一人
皆領儀刀六行第一親衛二十三人第二親衛二十五
人皆執金銅裝儀刀纁朱綬紛第三勳衛二十七人第
四勳衛二十九人皆執銀裝儀刀綠綬紛第五翊衛三
十一人第六翊衛三十三人皆執鍬石裝儀刀紫黃綬
紛自第一行有曲折三人陪後門每行加一人至第六
行八人次三衛十八人騎分左右夾路次金路駕四馬

駕士二十三人僕寺僕馭左右率府率二人執儀刀陪
乘次左右衛率府率二人夾路各一人從居供奉官後
次左右內率府率二人副率二人領細刀弓箭皆一人
從次千牛騎執細刀弓箭次三衛儀刀仗後開衙門次
左右監門率府直長各六人執鍬石儀刀騎監後門次
左右衛率府廂各翊衛二隊皆騎在執儀刀行外壓角
隊各三十人騎佩橫刀一人執旗二人引二人夾十五
人執稍二人佩弓箭三人佩弩隊各郎將一人主之次

繖二人執雉尾扇四夾繖次腰輦一執者八人團雉尾
扇二小方雉尾扇八以夾腰輦內直郎二人主之各令
史二人騎從次誕馬十分左右馭者各二人次典乘二
人各府史二人騎從次左右司禦率府校尉二人騎從
佩鍮石裝儀刀領團扇曲蓋次朱漆團扇六紫曲蓋六
各橫行次諸司供奉次左右清道率府校尉二人騎佩
鍮石裝儀刀主大角次副路駕四馬駕士二十二人輶
車駕一馬駕士十四人四望車駕一馬駕士十人次左

右廂步隊十六每隊果毅都尉一人領騎二十八戎服
大袍佩橫刀一人執旗二人引二人夾二十五人佩弓
箭前隊持稍與佩弓箭隊以次相間次左右司禦率府
副率各一人騎檢校步隊二人執驪稍騎從次儀仗左
右廂各六色每色九行行六人赤綦襖冒行膝鞋韞第
一戟赤氍六人第二弓箭六人第三儀鉞眊六人第四
刀楯六人第五儀鎗五色幡六人第六油戟六人次前
仗首左右廂各六色每色三行行六人左右司禦率府

二人果毅都尉各一人主帥各六人主之次左右廂各六色每色三行行六人左右衛率府副率二人果毅都尉各一人主帥各六人主之左右司禦率府主帥各六人騎護後率及副率各一人步從廂有絳引旂十二引前者六引後者六廂各有獨揭鼓六重重二人居儀仗外爰仗內皆赤綦襖冒行滕鞋襪左右司禦率府四重左右衛率府二重次左右廂皆百五十人左右司禦率府各八十六人左右衛率府各六十四人赤綦襖冒主

父分前後居步隊外馬隊內各司禦率府果毅都尉一人主之各一人騎從廂各主帥七人左右司禦率府各四人左右衛率府各三人騎分前後次左右廂馬隊廂各十隊隊有主帥以下三十一人戎服大袍佩橫刀騎隊有旗一執者一人引夾各二人皆佩弓箭十六人持稍七人佩弓箭三人佩弩第一左右清道率府果毅都尉二人主之第二第三第四左右司禦率府果毅都尉二人主之第五第六第七左右衛率府果毅都尉主之

第八第九第十左右司禦率府果毅都尉二人主之皆戎服大袍佩弓箭橫刀次後拒隊旗一執者佩橫刀引夾路各二人佩弓箭橫刀次清道率府果毅都尉一人領四十騎佩橫刀凡執鞘二十人佩弓箭十六人佩弩四人騎從次後拒隊前當正道受仗內有衙門次左右廂各有衙門三第一當左右司禦率府步隊後左右衛率府步隊前第二當左右衛率府步隊後左右司禦率府儀仗前第三當左右司禦率府儀仗後左右衛率府

步隊前每門二人執四人夾皆騎赤綦襖黃袍冒門有
監門率府直長二人檢校左右監門率府副率各二人
檢校諸門各一人騎從次左右清道率府副率各二人
檢校仗內不法各一人騎從次少師少傅少保正道乘
路備鹵簿文武以次從皇太子所至回車南嚮左庶子
跪奏請降路還宮一嚴轉仗衛于還塗再嚴左庶子版
奏請中嚴三嚴僕進車左庶子版奏外辦皇太子乘輿
出門外降輿乘車左庶子請車右升侍臣皆騎車動至

重明門宮官下馬皇太子乘車而入太傅少傅還皇太子至殿前車南嚮左庶子奏請降皇太子乘輿而入侍臣從至閣左庶子版奏解嚴若常行常朝無馬隊鼓吹金路四望車家令率更令詹事太保太師少保少師又減隊仗三之一清道儀刀誕馬皆減半乘輅車而已二傅乘犢車導從十人太傅加清道二人皇太子妃鹵簿清道率府校尉六人騎分左右為三重佩橫刀弓箭次青衣十人分左右次導客舍人四人內給使六十人皆

分左右後屬內人車次偏扇團扇方扇各十八分左右
宮人執者間綵衣草帶次行障四坐障二宮人執以夾
車次典內二人騎分左右次厭翟車駕三馬駕士十四
人次閤帥二人領內給使十八人夾車次六柱二內給
使執之次供奉內人乘犢車次繖一雉尾扇二團扇四
曲蓋二皆分左右各內給使執之次戟九十執者絳綦
襖冒分左右親王鹵簿有清道六人為三重武弁朱衣
革帶次幟弩一執者平巾幘緋袴褶騎次青衣十二人

平巾青幘青布袴褶執青布仗袋分左右次車輻十二
分左右車輻棒也夾車而行故曰車輻執者服如幘弩
次戟九十執者絳綦襖冒分左右次絳引旛六分左右
橫行以引刀楯弓箭稍次內第一行廂執刀楯絳綦襖
冒第二行廂執弓矢戎服第三行廂執稍戎服大袍廂
各四十人次節一夾稍一各一人騎執平巾幘大口袴
緋衫次告止旛四傳教旛四信旛八凡旛皆絳為之署
官號篆以黃飾以鳥翅取其疾也金塗鈎竿長一丈一

尺執者服如夾稍分左右次儀鉞二儀鏗六油戟十八
儀稍十細稍十執者皆絳綦襖冒次儀刀十八執者服
如夾稍分左右次誕馬八馭者服如夾稍分左右次府
佐六人平巾幘大口袴緋裋襦騎持刀夾引次象路一
駕四馬佐二人立侍一人武弁朱衣草帶居左一人緋
裋襦大口袴持刀居右駕士十八人服如夾稍次繖一
雉尾扇二次朱漆團扇四曲蓋二執者皆絳綦襖冒分
左右次僚佐本服陪從次麾幢各一左麾右幢次大角

鼓吹一品鹵簿有清道四人為二重轆弩一騎青衣十人車輻十人戟九十絳引旛六刀楯弓箭稍皆八十節二大稍二告止旛傳教旛皆二信旛六誕馬六儀刀十六府佐四人夾行革路一駕四馬駕士十六人繖一朱漆團扇四曲蓋二條佐本服陪從麾幢大角鏡吹皆備自二品至四品青衣車輻每品減二人二品刀楯弓箭戟稍各減二十三品以下每品減十而已二品信旛四誕馬四儀刀十四革路駕士十四人三品亦如之儀刀

十草路駕士十二人四品五品信旛二誕馬二儀刀八
木路駕士十人自二品至四品皆有清道二人朱漆團
扇二曲蓋一憶弩一騎旛竿長丈繖一節一夾稍二萬
年縣令亦有清道二人憶弩一騎青衣車輻皆二人戟
三十告止旛傳教旛信旛皆二竿長九尺誕馬二輅車
一馬駕士六人繖朱漆團扇曲蓋皆一非導駕及餘四
等縣初上者減憶弩車輻曲蓋其戟亦減十內命婦夫
人鹵簿青衣六人偏扇團扇皆十六執者間綵裙襦綵

裳革帶行障三坐障二厭翟車駕二馬馭人十內給使
十六人夾車從車六乘繖雉尾扇皆一團扇二內給使
執之戟六十外命婦一品亦如之厭翟車馭人減二有
從人十六人非公主王妃則乘白銅飾犢車駕牛馭人
四無雉尾扇嬪青衣四人偏扇團扇方扇十四行障二
坐障一翟車馭人八內給使十四人夾車四乘戟四十
外命婦二品亦如之乘白銅飾犢車青通幃朱裏從人
十四人嬋好美人人才人青衣二人偏扇團扇方扇十行

障二坐障一安車駕二馬馭人八內給使十人從車二
乘戟二十太子良娣良媛承徽外命婦三品亦如之白
銅飾犢車從人十人外命婦四品青衣二人偏扇團扇
方扇皆八行障坐障皆一白銅飾犢車馭人四從人八
餘同三品唯無戟自夫人以下皆清道二人繖一又有
團扇二大駕鹵簿鼓吹分前後二部鼓吹令二人府史
二人騎從分左右前部捫鼓十二夾金鈺十二大鼓長
鳴皆百二十鐃鼓十二歌簫笳次之大橫吹百二十節

鼓二笛簫感篳茄桃皮感篳次之撾鼓夾金鉦皆十二
小鼓中鳴皆百二十羽葆鼓十二歌簫茄次之至相風
舉有撾鼓一金鉦一鼓左鉦右至黃麾有左右金吾衛
果毅都尉二人主大角百二十橫行十重鼓吹丞二人
典事二人騎從次後部鼓吹羽葆鼓十二歌簫茄次之
鐃鼓十二歌簫茄次之小橫吹百二十笛簫感篳茄桃
皮感篳次之凡歌簫茄工各二十四人主帥四人笛簫
感篳茄桃皮感篳工各二十四人法駕減太常卿司徒

兵部尚書白鷺車辟惡車大輦五副路安車四望車又減屬車四清游隊持鉞隊玄武隊皆減四之一鼓吹減三之一小駕又減御史大夫指南車記里鼓車鸞旗車皮軒車象輦木三路耕根車羊車黃鉞車豹尾車屬車小輦小輿諸隊及鼓吹減大駕之半凡鼓吹五部一鼓吹二羽葆三鐃吹四大橫吹五小橫吹總七十五曲鼓吹部有摑鼓大鼓金鉦小鼓長鳴中鳴摑鼓十曲一警雷震二猛獸駭三驚鳥擊四龍媒蹠五靈夔吼六鵬鶚

爭七壯士怒八熊羆吼九石墜崖十波蕩壑大鼓十五
曲嚴用三曲一元驕合邏二元驕他固夜三元驕跋至
慮警用十二曲一元咳大至遊二阿列乾三破達析利
純四賀羽真五鳴都路跋六他勃鳴路跋七相雷析追
八元咳赤賴九赤咳赤賴十吐咳乞物真十一貪大計
十二賀粟胡真小鼓九曲一漁陽二鷄子三警鼓四三
鳴五合節六覆參七步鼓八南陽會星九單搖皆以為
嚴警其一上馬用之長鳴一曲三聲一龍吟聲二彪吼

聲三河聲中鳴一曲三聲一盪聲二牙聲三送聲羽葆
部十八曲一太和二休和三七德四騶虞五基王化六
纂唐風七厭炎精八肇皇運九躍龍飛十殄馬邑十一
興晉陽十二濟渭險十三應聖期十四御宸極十五寧
兆庶十六服遐荒十七龍池十八破陣樂鐃吹部七曲
一破陣樂二上車三行車四向城五平安六歡樂七太
平大橫吹部有節鼓二十四曲一悲風二遊絃三間絃
明君四吳明君五古明君六長樂聲七五調聲八烏夜

啼九望鄉十跨鞍十一間君十二瑟調十三止息十四
天女怨十五楚客十六楚妃歎十七霜鴻引十八楚歌
十九胡笳聲二十辭漢二十一對月二十二胡笳明君
二十三湘妃怨二十四沈湘小橫吹部有角笛簫笛感
篳桃皮感篳六種曲名失傳伶工謂夜警為嚴凡大駕
嚴夜警十二曲中警三曲五更嚴三遍天子謁郊廟夜
五鼓過半奏四嚴車駕至橋復奏一嚴元和初禮儀使
高郢建議罷之歷代獻捷必有凱歌太宗平東都破宋

金剛執賀魯克高麗皆備軍容凱歌入京都然其禮儀不傳太和初有司奏命將征討有大功獻俘馘則神策兵衛於門外如獻俘儀凱樂用鐃吹二部笛箏篳簫笳鐃鼓皆工二人歌工二十四人乘馬執樂陳列如鹵簿鼓吹令丞前導分行俘馘之前將入都門鼓吹振作奏破陣樂應聖期賀朝歡君臣同慶樂等四曲至太社太廟門外陳而不作吉獻禮畢樂作至御樓前陳兵仗于旌門外二十步樂工步行兵部尚書介冑執鉞于旌門

中路前導協律郎二人執麾門外分導太常卿跪請奏
凱樂樂闋太常卿跪奏樂畢兵部尚書太常卿退樂工
立于旌門外引俘馘入獻及稱賀俘囚出乃退



唐書卷二十三下

欽定四庫全書

史部
唐書卷二十四至
六

詳校官編修臣錢樾

洗馬臣王坦修覆勘

覆校官庶吉士臣徐立綱

校對官主事臣張培

謄錄貢生臣馮省槐

欽定四庫全書

唐書卷二十四

宋翰林學士歐陽修撰

志第十四

車服志

唐初受命車服皆因隋舊武德四年始著車輿衣服之令上得兼下下不得僣上凡天子之車曰玉路者祭祀納后所乘也青質玉飾末金路者饗射祀還飲至所乘

也赤質金飾末象路者行道所乘也黃質象飾末革路者臨兵巡守所乘也白質鞵以革木路者蒐田所乘也黑質漆之五路皆重輿左青龍右白虎金鳳翅畫莖文鳥獸黃屋左纛金鳳一鈴二在軾前鸞十二在衡龍輶前設郵塵青蓋三層繡飾上設博山方鏡下圓鏡樹羽輪金根朱班重牙左建旂十有二旒畫升龍其長曳地青繡綢杠右載闔戟長四尺廣三尺黻文旂首金龍銜錦結綬及綏帶垂鈴金鍍方鈇挿翟尾五焦鏤錫鞞纓

十二就旌旗蓋輦纓皆從路質唯蓋裏皆用黃五路皆有副耕根車者耕藉所乘也青質三重蓋餘如玉路安車者臨幸所乘也金飾重輿曲壁紫油纁朱裏通憶朱絲絡網朱輦纓朱覆髮具絡駕赤駟副路耕根車安車皆八轡四望車者拜陵臨弔所乘也制如安車青油纁朱裏通憶朱絲絡網又有屬車十乘一曰指南車二曰記里鼓車三曰白鷺車四曰鷺旗車五曰辟惡車六曰皮軒車七曰羊車與耕根車四望車安車為十乘行幸

陳于鹵簿則分前後大朝會則分左右皇后之車六重
翟車者受冊從祀饗廟所乘也青質青油纁朱裏通幘
繡紫絡帶及帷八鸞鏤錫輦纁十二就金鍍方鉞樹翟
羽朱纁厭翟車者親桑所乘也赤質紫油纁朱裏通幘
紅錦絡帶及帷翟車者歸寧所乘也黃油纁黃裏通幘
白紅錦絡帶及帷三車皆金飾末輪畫朱牙箱飾翟羽
朱絲絡網輦纁色皆從車質安車者臨幸所乘也制如
金路紫油纁朱裏通幘四望車者拜陵弔喪所乘也青

油纁朱裏通憶金根車者常行所乘也紫油纁朱裏通
憶夫人乘厭翟車九嬪乘翟車婕妤以下乘安車外命
婦公主王妃乘厭翟車一品乘白銅飾犢車青油纁朱
裏通憶朱絲絡網二品以下去油纁絡網四品有青偏
憶皇太子之車三金路者從祀朝賀納妃所乘也赤質
金飾末重較箱畫匡文鳥獸黃屋伏鹿軾龍輶金鳳一
在軾前設鄣塵朱黃蓋裏輪畫朱牙左建旂九旒右載
闐戟旂首金龍銜結綬及鈴綏八鸞二鈴金鍔方鉞樹

翟尾五焦鏤錫輦纓九就輅車者五日常服朝饗宮臣
出入行道所乘也四望車者臨弔所乘也二車皆金飾
末紫油纁朱裏通憶親王及武職一品有象路青油纁
朱裏通憶朱絲絡網二品三品有革路朱裏青通憶四
品有木路五品有輅車皆碧裏青偏憶象飾末班輪八
鸞左建旗畫升龍右載闔戟革路木路左建纁輅車曲
壁碧裏青通憶諸路朱質朱蓋朱旂朱班輪一品之纁
九旒二品八旒三品七旒四品六旒輦纓就亦如之三

品以上珂九子四品七子五品五子六品以下去通憶
及珂王公車路藏于太僕受制行冊命巡陵昏葬則給
之餘皆以騎代車凡天子之服十四大裘冕者祀天地
之服也廣八寸長一尺二寸以板為之黑表纁裏無旒
金飾玉簪導組帶為纓色如其綬黻纁充耳大裘緇表
黑羔表為緣纁裏黑領標金緣朱裳白紗中單皂領青
標襪裾朱韍赤舄鹿盧玉具劔火珠鏤首白玉雙佩黑
組大雙綬黑質黑黃赤白縹綠為純以備天地四方之

色廣一尺長二丈四尺五百首紛廣二寸四分長六尺四寸色如綬又有小雙綬長二尺六寸色如大綬而首半之間施三玉環革帶以白皮為之以屬佩綬印革鞶囊亦曰鞶帶博三寸半加金鏤玉鈎鑠大帶以素為之以朱為裏在腰及垂皆有裨上以朱錦貴正色也下以綠錦賤間色也博四寸紐約貴賤皆用青組博三寸蔽以緇為之隨囊色上廣一尺以象天數下廣二尺以象地數長三尺朱質畫龍火山三章以象三才其頸五寸

兩角有肩廣二寸以屬革帶朝服謂之韠冕服謂之黻
衮冕者踐祚饗廟征還遣將飲至加元服納后元日受
朝賀臨軒冊拜王公之服也廣一尺二寸長二尺四寸
金飾玉簪導垂白珠十二旒朱絲組帶為纓色如綬深
青衣纁裳十二章日月星辰山龍華蟲火宗彝八章在
衣藻粉米黼黻四章在裳衣畫裳繡以象天地之色也
自山龍以下每章一行為等每行十二衣標領畫以升
龍白紗中單黻領青標襪裾黻繡龍山火三章舄加金

飾鷩冕者有事遠主之服也八旒七章華蟲火宗彝三章在衣藻粉米黼黻四章在裳毳冕者祭海嶽之服也七旒五章宗彝藻粉米在衣黼黻在裳絺冕者祭社稷饗先農之服也六旒三章絺粉米在衣黼黻在裳玄冕者蜡祭百神朝日夕月之服也五旒裳刺黼一章自衮冕以下其制一也簪導劔佩綬皆同通天冠者冬至受朝賀祭還燕羣臣養老之服也二十四梁附蟬十二首施珠翠金博山黑介憤組纓翠綏玉犀簪導絳紗袍朱

裏紅羅裳白紗中單朱領標襪裾白裙襦絳紗蔽膝白
羅方心曲領白鞵黑舄白假帶其制垂二條帛以變祭
服之大帶天子未加元服以空頂黑介幘雙童髻雙玉
導加寶飾三品以上亦加寶飾五品以上雙玉導金飾
六品以下無飾緇布冠者始冠之服也天子五梁三品
以上三梁五品以上二梁九品以上一梁武弁者講武
出征蒐狩大射禡類宜社賞祖罰社纂嚴之服也有金
附蟬平巾幘弁服者朔日受朝之服也以鹿皮為之有

攀以持髮十有二璫玉簪導絳紗衣素裳白玉雙佩革帶之後有鞞囊以盛小雙綬白鞞烏皮履黑介幘者拜陵之服也無飾白紗單衣白裙襦革帶素鞞烏皮履白紗帽者視朝聽訟宴見賓客之服也以烏紗為之白裙襦白鞞烏皮履平巾幘者乘馬之服也金飾玉簪導冠支以玉紫褶白袴玉具裝珠寶鈿帶有鞞白恰者臨喪之服也白紗單衣烏皮履皇后之服三褱衣者受冊助祭朝會大事之服也深青織成為之畫鞞赤質五色十

二等素紗中單黼領朱羅縠裸襪蔽膝隨裳色以緇領
為緣用翟為章三等青衣革帶大帶隨衣色裨紐約佩
綬如天子青鞵舄加金飾鞠衣者親蠶之服也黃羅為
之不畫蔽膝大帶革帶舄隨衣色餘同禕衣鈿釵禮衣
者燕見賓客之服也十一鈿服用雜色而不畫加雙佩
小綬去舄加履首飾大小華十二樹以象袞冕之旒又
有兩博鬢皇太子之服六袞冕者從祀謁廟加元服納
妃之服也白珠九旒紅絲組為纓犀簪導青纊充耳黑

衣纁裳凡九章龍山華蟲火宗彝在衣藻粉米黼黻在裳白紗中單黼領青標襪裾革帶金鈎鐔大帶瑜玉雙佩朱組雙大綬朱質赤白縹紺為純長一丈八尺廣九寸三百二十首黻隨裳色有火山二章白鞞赤舄朱履加金塗銀釳飾鹿盧玉具劔如天子遠遊冠者謁廟還宮元日朔日入朝釋奠之服也以具服遠遊冠三梁加金博山附蟬九首施珠翠黑介憤髮纓翠綉犀簪導絳紗袍紅裳白紗中單黑領標襪裾白裙襦白假帶方心

曲領絳紗蔽膝白韞赤舄朔日入朝通服袴褶公服者
五日常朝元日冬至受朝之服也遠遊冠絳紗單衣白
裙襦革帶金鉤釵假帶瑜玉雙佩方心紛金鏤鞞囊純
長六尺四寸廣二寸四分色如大綬烏紗帽者視事及
燕見賓客之服也白裙襦烏皮履弁服者朔望視事之
服也鹿皮為之犀簪導組纓九璫絳紗衣素裳革帶鞞
囊小綬雙佩自具服以下皆白韞烏皮履平巾幘者乘
馬之服也金飾犀簪導紫褶白袴起梁珠寶鈿帶鞞進

德冠者亦乘馬之服也九璫加金飾有袴褶常服則有
白裙襦皇太子妃之服有三褕翟者受冊助祭朝會大
事之服也青織成文為搖翟青質五色九等素紗中單
黼領朱羅縠裸襪蔽膝隨裳色用緇為領緣以翟為章
二等青衣革帶大帶隨衣色不朱裏青韞襖加金飾佩
綬如皇太子鞠衣者從蠶之服也以黃羅為之制如褕
翟無雉蔽膝大帶隨衣色鈿釵禮衣者燕見賓客之服
也九鈿其服用雜色制如鞠衣加雙佩小綬去舄加履

首飾花九樹有兩博鬢羣臣之服二十有一袞冕者一品之服也九旒青璆為珠貫三采玉以組為纓色如其綬青纁充耳實飾角簪導青衣纁裳九章龍山華蟲火宗彝在衣藻粉米黼黻在裳皆絳為繡遍衣白紗中單黼領青襟襪裾朱鞅赤舄革帶鉤釧大帶黻隨裳色金寶玉飾劔鏢首山玄玉佩綠綬綬綠質綠紫黃赤為純長一丈八尺廣九寸二百四十首郊祀太尉攝事亦服之鷩冕者二品之服也八旒青衣纁裳七章華蟲火宗

彝在衣藻粉米黼黻在裳銀裝劒佩水蒼玉紫綬紫質
紫黃赤為純長一丈六尺廣八寸一百八十首革帶之
後有金鏤鞶囊金飾劒水蒼玉佩朱鞮赤舄冕者三
品之服也七旒寶飾角簪導五章宗彝藻粉米在衣黼
黻在裳黻二章山火紫綬如二品金銀鏤鞶囊金飾劒
水蒼玉佩朱鞮赤舄絺冕者四品之服也六旒三章粉
米在衣黼黻在裳中單青領黻山一章銀鏤鞶囊自三
品以下皆青綬青質青白紅為純長一丈四尺廣七寸

一百四十首金飾劔水蒼玉佩朱鞮赤舄玄冕者五品之服也以羅為之五旒衣黻無章裳刺黻一章角簪導青衣纁裳其服用紬大帶及裨外黑內黃黑綬紺質青紺為純長一丈二尺廣六寸二百二十首象笄上圓下方六品以竹木上挫下方金飾劔水蒼玉佩朱鞮赤舄三品以下私祭皆服之平冕者郊廟武舞郎之服也黑衣絳裳革帶烏皮履爵弁者六品以下九品以上從祀之服也以紬為之無旒黑纓角簪導青衣纁裳白紗中

單青領襖襪裾革帶鉤鑠大帶及裋內外皆緇爵韞白
韞赤履五品以上私祭皆服之武弁者武官朝參殿庭
武舞郎堂下鼓人鼓吹按工之服也有平巾幘武舞緋
絲布大襖白練襪襠膝蛇起梁帶豹文大口袴烏皮鞋
鼓人朱襖衣革帶烏皮鞋鼓吹按工加白練襪襠弁服
者文官九品公事之服也以鹿皮為之通用烏紗牙簪
導纓一品九璫二品八璫三品七璫四品六璫五品五
璫犀簪導皆朱衣素裳革帶鞶囊小綬雙佩白韞烏皮

履六品以下去璫及鞞囊綬佩六品七品綠衣八品九品青衣進賢冠者文武朝參三老五更之服也黑介幘青綾紛長六尺四寸廣四寸色如其綬三品以上三梁五品以上兩梁九品以上及國官一梁六品以下私祭皆服之侍中中書令左右散騎常侍有黃金璫附蟬貂尾侍左者左珥侍右者右珥諸州大中正一梁絳紗公服殿庭文舞郎黃紗袍黑領襪白練襪白布大口袴革帶烏皮履遠遊冠者親王之服也黑介幘三梁青綾

金鈎襍大帶金寶飾劔玉鏢首纁朱綬朱質赤黃纁紉
為純長一丈八尺廣九寸二百四十首黃金璫附蟬諸
王則否法冠者御史大夫中丞御史之服也一名解鴈
冠高山冠者內侍省內謁者親王司閤謁者之服也委
貌冠者郊廟文舞郎之服也有黑絲布大褰白練領襍
絳布大口絳革帶烏皮履却非冠者亭長門僕之服也
平巾幘者武官衛官公事之服也金飾五品以上魚用
玉大口絳烏皮鞞白練裙襦起梁帶陪大仗有衲襜褕

虵朝集從事州縣佐史岳瀆祝史外州品子庶民任掌
事者服之有緋褶大口袴紫附襦文武官騎馬服之則
去襦襠虵袴褶之制五品以上細綾及羅為之六品
以下小綾為之三品以上紫五品以上緋七品以下綠
九品以上碧襦襠之制一當胷一當背短褰覆膊虵蛇
之制以錦為表長八尺中實以綿象虵形起梁帶之制
三品以上玉梁寶鈿五品以上金梁寶鈿六品以下金
飾隱起而已黑介幘者國官視品府佐謁府國子太學

四門生俊士參見之服也簪導白紗單衣青襟襖領革帶烏皮履未冠者冠則空頂黑介幘雙童髻去革帶書算律學生州縣學生朝參則服烏紗帽白裙襦青領未冠者童子髻介幘者流外官行署三品以下登歌工人之服也絳公服以縵緋為之制如絳紗單衣方心曲領革帶鉤鐔假帶鞮烏皮履九品以上則絳繡衣制如絳公服而狹褱形直如繡不垂緋褶大口袴紫附繡去方心曲領假帶登歌工人朱連裳革帶烏皮履殿庭加白

練襪襠平巾綠幘者尚食局主膳典膳局典食大官署
食官署供膳奉觶之服也青絲布袴褶羊車小史五辨
髻紫碧腰襴青耳屨漏刻生漏童總角髻皆青絲布袴
褶具服者五品以上陪祭朝饗拜表大事之服也亦曰
朝服冠幘簪導絳紗單衣白紗中單黑領裏黑襌襪裾
白裙襦革帶金鉤釵假帶曲領方心絳紗蔽膝白韞烏
皮舄舄紛鞞囊雙佩雙綬六品以下去舄佩綬七品以
上以白筆代簪八品九品去白筆白紗中單以履代舄

從省服者五品以上公事朔望朝謁見東宮之服也亦
曰公服冠幘纓簪導絳紗單衣白裾襦革帶鉤鐔假帶
方心鞮履紛鞞囊雙佩烏皮履六品以下去紛鞞囊雙
佩三品以上有公爵者嫡子之婚假絳冕五品以上子
孫九品以上子爵弁庶人婚假絳公服命婦之服六翟
衣者內命婦受冊從蠶朝會外命婦嫁及受冊從蠶大
朝會之服也青質繡翟編次於衣及裳重為九等青紗
中單黼領朱紱標襪裾蔽膝隨裳色以緞為領緣加文

繡重雉為章二等大帶隨衣色以青衣革帶青鞵烏佩
綬兩博鬚飾以寶鈿一品翟九等花釵九樹二品翟八
等花釵八樹三品翟七等花釵七樹四品翟六等花釵
六樹五品翟五等花釵五樹寶鈿視花樹之數鈿釵禮
衣者內命婦常參外命婦朝參辭見禮會之服也制同
翟衣加雙佩小綬去舄加履一品九鈿二品八鈿三品
七鈿四品六鈿五品五鈿禮衣者六尚寶林御女采女
女官七品以上大事之服也通用雜色制如鈿釵禮衣

唯無首飾佩綬公服者常供奉之服也去中單蔽膝大帶九品以上大事常供奉亦如之半袖裙襦者東宮女史常供奉之服也公主王妃佩綬同諸王花釵禮衣者親王納妃所給之服也大褰連裳者六品以下妻九品以上女嫁服也青質素紗中單蔽膝大帶革帶鞬履同裳色花釵履笄兩博鬢以金銀雜寶飾之庶人女嫁有花釵以金銀琉璃塗飾之連裳青質青衣革帶鞬履同裳色婦人燕服視夫百官女嫁廟見攝母服五品以上

媵降妻一等妾降媵一等六品以上妾降妻一等天子
有傳國璽及八璽皆玉為之神璽以鎮中國藏而不用
受命璽以封禪禮神皇帝行璽以報王公書皇帝之璽
以勞王公皇帝信璽以召王公天子行璽以報四夷書
天子之璽以勞四夷天子信璽以召兵四夷皆泥封大
朝會則符璽郎進神璽受命璽于御座行幸則合八璽
為五舉函封從于黃鉞之內太皇太后皇太后皇后皇
太子及妃璽皆金為之藏而不用太皇太后皇太后封

令書以宮官印皇后以內侍省印皇太子以左春坊印
妃以內坊印初太宗刻受命玄璽以白玉為螭首文曰
皇天景命有德者昌至武后改諸璽皆為寶中宗即位
復為璽開元六年復為寶天寶初改璽書為寶書十載
改傳國寶為承天大寶初高祖入長安罷隋竹使符班
銀莧符其後改為銅魚符以起軍旅易守長京都留守
折衝府捉兵鎮守之所及左右金吾宮苑總監牧監皆
給之畿內則左三右一畿外則左五右一左者進內右

者在外用始第一周而復始宮殿門城門給交魚符巡
魚符左廂右廂給開門符閉門符亦左符進內右符監
門掌之蕃國亦給之雄雌各十二銘以國名雄者進內
雌者付其國朝貢使各齎其月魚而至不合者劾奏傳
信符者以給郵驛通制命皇太子監國給雙龍符左右
皆十兩京北都留守給麟符左二十右十九東方諸州
給青龍符南方諸州朱雀符西方諸州騶虞符北方諸
州玄武符皆左四右三左者進內右者付外行軍所亦

給之隨身魚符者以明貴賤應召命左二右一左者進
內右者隨身皇太子以玉契召勘合乃赴親王以金庶
官以銅皆題其位姓名官有貳者加左右皆盛以魚袋
三品以上飾以金五品以上飾以銀刻姓名者去官納
之不刻者傳佩相付有傳符銅魚符者給封符印發驛
封符及封魚函用之有銅魚而無傳符者給封函還符
封函用之天子巡幸則京師東都留守給留守印諸司
從行者給行從印木契符者以重鎮守慎出納畿內左

右皆三畿外左右皆五皇帝巡幸太子監國有軍旅之事則用之王公征討皆給焉左右各十九太極殿前刻漏所亦以左契給之右以授承天門監門晝夜勘合然後鳴鼓玄武門苑內諸門有喚人木契左以進內右以授監門有勅召者用之魚契所降皆有勅書尚書省符與左同乃用大將出賜旌以顯賞節以顯殺旌以絳帛五丈粉畫虎有銅龍一首纏緋旛紫魚為袋油囊為表節懸畫木盤三相去數寸隅垂赤麻餘與旌同高宗給

五品以上隨身魚銀袋以防召命之詐出內必合之三品以上金飾袋垂拱中都督刺史始賜魚天授二年改佩魚皆為龜其後三品以上龜袋飾以金四品以銀五品以銅中宗初罷龜袋復給以魚郡王嗣王亦佩金魚袋景龍中令特進佩魚散官佩魚自此始也然員外試檢校官猶不佩魚景雲中詔衣紫者魚袋以金飾之衣緋者以銀飾之開元初駙馬都尉從五品者假紫金魚袋都督刺史品卑者假緋魚袋五品以上檢校試判官

皆佩魚中書令張嘉貞奏致仕者佩魚終身自是百官
賞緋紫必魚魚袋謂之章服當時服朱紫佩魚者衆矣
初隋文帝聽朝之服以赭黃文綾袍烏紗帽折上巾六
合鞞與貴臣通服唯天子之帶有十三環文官又有平
頭小樣巾百官常服同於庶人至唐高祖以赭黃袍巾
帶為常服腰帶者搢垂頭以下名曰鉞尾取順下之義
一品二品鈐以金六品以上以犀九品以上以銀庶人
以鐵既而天子袍衫稍用赤黃遂禁臣民服親王及三

品二王後服大科綾羅色用紫飾以玉五品以上服小
科綾羅色用朱飾以金六品以上服絲布交梭雙紉綾
色用黃六品七品服用綠飾以銀八品九品服用青飾
以鍤石勲官之服隨其品而加佩刀礪紛帨流外官庶
人部曲奴婢則服紬絹絕布色用黃白飾以鐵銅太宗
時又命七品服龜甲雙巨十花綾色用綠九品服絲布
雜綾色用青是時士人以棠苧襪衫為上服貴女功之
始也一命以黃再命以黑三命以纁四命以綠五命以

紫士服短褐庶人以白中書令馬周上議禮無服衫之
文三代之制有深衣請加襴袖標襪為士人上服開袴
者名曰缺袴衫庶人服之又請裹頭者左右各三襴以
象三才重繫前脚以象二儀詔皆從之太尉長孫无忌
又議服袍者下加襴緋紫綠皆視其品庶人以白太宗
嘗以幘頭起於後周便武事者也方天下偃兵採古制
為翼善冠自服之又製進德冠以賜貴臣玉璫制如弁
服以金飾梁花趺三品以上加金絡五品以上附山雲

自是元日冬至朔望視朝服翼善冠衣白練裙襦常服
則有袴褶與平巾幘通用翼善冠進德冠制如幘頭皇
太子乘馬則服進德冠九璫加金飾犀簪導亦有綉褶
燕服用紫其後朔望視朝仍用弁服顯慶元年長孫无
忌等曰武德初撰衣服令天子祀天地服大裘冕按周
郊被袞以象天戴冕藻十有二旒與大裘異月令孟冬
天子始裘以禦寒若啓蟄祈穀冬至報天服裘可也季
夏迎氣龍見而雩如之何可服故歷代唯服袞章漢明

帝始采周官禮記制祀天地之服天子備十二章後魏周隋皆如之伏請郊祀天地服袞冕罷大裘又新禮皇帝祭社稷服絺冕四旒三章祭日月服玄冕三旒衣無章按令文四品五品之服也三公亞獻皆服袞孤卿服毳鷩是天子同於大夫君少臣多非禮之中且天子十二為節以法天鳥有四旒三章之服若諸臣助祭冕與王同是貴賤無分也若降王一等則王服玄冕羣臣服爵弁既屈天子又貶公卿周禮此文久不用矣猶祭祀

之有尸侑以君親而拜臣子若族姻氏之職不通行者
蓋多故漢魏承用袞冕今新禮親祭日月服五品之服
請循歷代故事諸祭皆用袞冕制曰可无忌等又曰禮
皇帝為諸臣及五服親舉哀素服今服白袷禮令乖舛
且白袷出近代不可用乃改以素服自是驚冕以下天
子不復用而白袷廢矣其後以紫為三品之服金玉帶
鈐十三緋為四品之服金帶鈐十一淺緋為五品之服
金帶鈐十深綠為六品之服淺綠為七品之服皆銀帶

鈐九深青為八品之服淺青為九品之服皆鍤石帶鈐
八黃為流外官及庶人之服銅鐵帶鈐七武后擅政多
賜羣臣巾子繡袍勒以回文之銘皆無法度不足紀至
中宗又賜百官英王踰樣巾其製高而踰帝在藩時冠
也其後文官以紫黑絕為巾賜供奉官及諸司長官則
有羅巾圓頭巾子後遂不改初職事官三品以上賜金
裝刀礪石一品以下則有手巾算袋佩刀礪石至睿宗
時罷佩刀礪石而武官五品以上佩韞韞七事佩刀刀

子礪石契必真職厥針筒火石是也時皇太子將釋奠
有司草儀注從臣皆乘馬著衣冠左庶子劉子玄議曰
古大夫乘車以馬為駢服魏晉朝士駕牛車如李廣北
征解鞍憇息馬援南伐據鞍顧眄則鞍馬行於軍旅戎
服所便江左尚書郎乘馬則御史治之顏延年罷官騎
馬出入世稱放誕近古專車則衣朝服單馬則衣褻服
皇家巡謁陵廟冊命王公則盛服冠履乘路車士庶有
以衣冠親迎者亦時服箱其餘貴賤皆以騎代車比者

法駕所幸侍臣朝服乘馬今既舍車而冠履不易何者
褰衣博帶革履高冠車中之服也韞而銜跣而乘非唯
盭古亦自取驚蹶議者以祕閣梁南郊圖有衣冠乘馬
者此圖後人所為也古今圖畫多矣如畫羣公祖二疏
而有曳芒屨者畫昭君入匈奴而婦人有施帷冒者夫
芒屨出於水鄉非京華所為帷冒創於隋代非漢宮所
用豈可因二畫以為故實乎謂乘馬衣冠宜省太子從
之編于令開元初將有事南郊中書令張說請遵古制

用大裘乃命有司製二冕玄宗以大裘樸略不可通寒暑廢而不服自是元正朝會用袞冕通天冠百官朔望朝參外官衙日則佩算袋餘日則否玄宗謁五陵初用素服朔望朝顙用常服弁服翼善冠皆廢唐初賞朱紫者服於軍中其後軍將亦賞以假緋紫有從戎缺齠之服不在軍者服長袍或無官而冒衣綠有詔殿中侍御史糾察諸衛大將軍中郎以下給袍者皆易其繡文千牛衛以瑞牛左右衛以瑞馬駢衛以虎武衛以鷹威衛

以豹領軍衛以白澤金吾衛以辟邪行六品者冠去璆珠五品去鞞囊雙佩幘頭用羅縠婦人服從夫子五等以上親及五品以上母妻服紫衣腰襜褕緣用錦繡九品以上母妻服朱衣流外及庶人不服綾羅縠五色線鞞履凡襴色衣不過十二破渾色衣不過六破二十五
年御史大夫李適之建議冬至元日大禮朝參官及六品清官服朱衣六品以下通服絳褶天寶中御史中丞吉溫建議京官朔望朝參衣朱絳褶五品以上有珂傘

德宗嘗賜節度使時服以鵬銜綬帶謂其行列有序牧
人有威儀也元和十二年太子少師鄭餘慶言百官服
朝服者多誤自今唯職事官五品兼六品以上散官者
則有佩劍綬其餘皆省初婦人施幕羅以蔽身永徽中
始用帷冒施裙及頸坐檐以代乘車命婦朝謁則以駟
駕車數下詔禁而不止武后時帷冒益盛中宗後乃無
復幕羅矣宮人從駕皆胡冒乘馬海內劬之至露髻馳
騁而帷冒亦廢有衣男子衣而鞞如奚契丹之服武德

間婦人曳履及線襪開元中初有線鞋侍兒則著履奴婢服襴衫而士女衣胡服其後安祿山反當時以為服妖之應巴蜀婦人出入有兜籠乾元初蕃將又以兜籠易負遂以代車文宗即位以四方車服僭奢下詔準儀制令品秩勲勞為等級職事官服綠青碧勲官諸司則佩刀礪紛悅諸親朝賀宴會之服一品二品服玉及通犀三品服花犀斑犀車馬無飾金銀衣曳地不過二寸袖不過一尺三寸婦人裙不過五幅曳地不過三寸襦

袖不過一尺五寸祀襖之制三品以上服綾以鵲銜瑞
草鴈銜綬帶及雙孔雀四品五品服綾以地黃交枝六
品以下服綾小窠無文及隔織獨織一品導從以七騎
二品三品以五騎四品以三騎五品以二騎六品以一
騎五品以上及節度使冊拜婚會則車有幃外命婦一
品二品三品乘金銅飾犢車檐舁以八人三品舁以六
人四品五品乘白銅飾犢車檐舁以四人胥吏商賈之
妻老者乘輦輦車兜籠舁以二人度支部鹽鐵門官

等服細葛布無紋綾綠闇銀藍鐵帶鞍轡銜鐙以鍮石
未有官者服麤葛布官純綠銅鐵帶乘蜀馬鐵鐙行官
服紫麤布純藍鐵帶中官不衣紗縠綾羅諸司小兒不
服大中商賈庶人僧道士不乘馬婦人衣青碧纈平頭
小花草履彩帛縵成履而禁高髻險粧去眉開額及吳
越高頭草履王公之居不施重拱藻井三品堂五間九
架門三間五架五品堂五間七架門三間兩架六品七
品堂三間五架庶人四架而門皆一間兩架常參官施

懸魚對鳳瓦獸通楸乳梁詔下人多怨者京兆尹杜棕
條易行者為寬限而事遂不行唯淮南觀察使李德裕
令管內婦人衣襖四尺者闊一尺五寸裙曳地四五寸
者減三寸開成未定制宰相三公師保尚書令僕射諸
司長官及致仕官疾病許乘檐如漢魏載輿步輿之制
三品以上官及刺史有疾暫乘不得舍驛

唐書卷二十四

唐書卷二十四考證

車服志朱覆髮具絡○舊書具作貝又髮上有髮字

皮軒車○舊書無皮字

唐書卷二十四考證

欽定四庫全書

唐書卷二十五

宋翰林學士歐陽修撰

志第十五

歷志

歷法尚矣自堯命羲和歷象日月星辰以閏月定四時
成歲其事略見于書而夏商周以三統改正朔為歷固
已不同而其法不傳至漢造歷始以八十一分為統母

其數起於黃鍾之命蓋其法一本於律矣其後劉歆又以春秋易象推合其數蓋傅會之說也至唐一行始專用大衍之策則歷術又本於易矣蓋歷起於數數者自然之用也其用無窮而無所不通以之於律於易皆可以合也然其要在於候天地之氣以知四時寒暑而仰察天日月星之行運以相參合而已然四時寒暑無形而運於下天日月星有象而見于上二者常動而不息一有一無出入升降或遲或疾不相為謀其久而不能

無差忒者勢使之然也故為歷者其始未嘗不精密而
其後多疎而不合亦理之然也不合則屢變其法以求
之自堯舜三代以來歷未嘗同也唐終始二百九十餘
年而歷八改初曰戊寅元歷曰麟德甲子元歷曰開元
大衍歷曰寶應五紀歷曰建中正元歷曰元和觀象歷
曰長慶宣明歷曰景福崇玄歷而止矣高祖受禪將治
新歷東都道士傅仁均善推步之學太史令庾儉丞傅
奕薦之詔仁均與儉等參議合受命歲名為戊寅元歷

乃列其大要所可考驗者有七曰唐以戊寅歲甲子日
登極歷元戊寅日起甲子如漢太初一也冬至五十餘
年輒差一度日短星昴合于堯典二也周幽王六年十
月辛卯朔入蝕限合于詩三也魯僖公五年壬子冬至
合春秋命歷序四也月有三大三小則日蝕常在朔月
蝕常在望五也命辰起子半命度起虛六符陰陽之始
六也立遲疾定朔則月行晦不東見朔不西眺七也高
祖詔司歷起二年用之擢仁均員外散騎侍郎三年正

月望及二月八月朔當蝕比不効六年詔吏部郎中祖孝孫考其得失孝孫使筭歷博士王孝通以甲辰歷法詰之曰日短星昴以正仲冬七宿畢見舉中宿言耳舉中宿則餘星可知仁均專守昴中執文害意不亦謬乎又月令仲冬昏東壁中明昴中非為常準若堯時星昴昏中差至東壁然則堯前七千餘歲冬至昏翼中日應在東井井極北去人最近故暑斗極南去人最遠故寒寒暑易位必不然矣又平朔定朔舊有二家三大三小

為定朔望一大一小為平朔望日月行有遲速相及謂之合會晦朔無定由時消息若定大小皆在朔者合會雖定而節元紀首三端竝失若上合履端之始下得歸餘於終合會有時則甲辰元歷為通術矣仁均對曰宋祖沖之立歲差隋張胄玄等因而修之雖差數不同各明其意孝通未曉乃執南斗為冬至常星夫日躔宿度如郵傳之過宿度既差黃道隨而變矣書云季秋月朔辰弗集于房孔氏云集合也不合則日蝕可知又云先

時者殺無赦不及時者殺無赦既有先後之差是知定朔矣詩云十月之交朔月辛卯又春秋傳曰不書朔官失之也自後歷差莫能詳正故秦漢以來多非朔蝕宋御史中丞何承天微欲見意不能詳究乃為散騎侍郎皮延宗等所抑孝通之語乃延宗舊說治歷之本必推上元日月如合璧五星如連珠夜半甲子朔旦冬至自此七曜散行不復餘分普盡總會如初唯朔分氣分有可盡之理因其可盡即有三端此乃紀其日數之元爾

或以為即夜半甲子朔冬至者非也冬至自有常數朔名由於月起月行遲疾匪常三端安得即合故必須日月相合與至同日者乃為合朔冬至耳孝孫以為然但畧去尤疎濶者九年復詔大理卿崔善為與孝通等較定善為所改凡數十條初仁均以武德元年為歷始而氣朔遲疾交會及五星皆有加減至是復用上元積筭其周天度即古赤道也貞觀初直太史李淳風又上疏論十有八事復詔善為課二家得失其七條改從淳風

十四年太宗將親祀南郊以十一月癸亥朔甲子冬至而淳風新術以甲子合朔冬至乃上言古歷分日起於子半十一月當甲子合朔冬至故太史令傅仁均以減餘稍多子初為朔遂差三刻司歷南宮子明太史令薛頤等言子初及半日月未離淳風之法較春秋已來晷度薄蝕事皆符合國子祭酒孔穎達等及尚書八座參議請從淳風又以平朔推之則二歷皆以朔日冬至於事彌合且平朔行之自古故春秋傳或失之前謂晦日

也雖癸亥日月相及明日甲子為朔可也從之十八年
淳風又上言仁均歷有三大三小云日月之蝕必在朔
望十九年九月後四朔頻大詔集諸解歷者詳之不能
定庚子詔用仁均平朔訖麟德元年仁均歷法祖述冑
玄稍以劉孝孫舊議參之其大最疎於淳風然更相出
入其有所中淳風亦不能逾之今所記者善為所較也
戊寅歷上元戊寅歲至武德九年丙戌積十六萬四千
三百四十八筭外

章歲六百七十六

亦名行
分法

章閏二百四十九

章月

八千三百六十一

月法三十八萬四千七十五

日

法萬三千六

時法六千五百三

度法氣法九千四

百六十四

氣時法千一百八十三歲分三百四十五

萬六千六百七十五

歲餘二千三百一十五

周分

三百四十五萬六千八百四十五半

斗分一千四百

八十五半

沒分七萬六千八百一十五

沒法千一

百三 歷日二十七歷餘萬六千六十四

歷周七十

九萬八千二百 歷法二萬八千九百六十八 餘數
四萬九千六百三十五

章月乘年如章歲得一為積月以月法乘積月如日法
得一為朔積日餘為小餘日滿六十去之餘為大餘命
甲子筭外得天正平朔加大餘二十九小餘六千九百
一得次朔加平朔大餘七小餘四千九百七十六小分
四之三為上弦又加得望又加得下弦餘數乘年如氣
法得一為氣積日命日如前得冬至加大餘十五小餘

二千六十八小分八之一得次氣日加四季之節大餘
十二小餘千六百五十四小分四得土王凡節氣小餘
三之以氣時法而一命子半筭外各其加時置冬至小
餘八之減沒分餘滿沒法為日加冬至去朔日筭依月
大小去之日不滿月筭得沒日餘分盡為減加日六十
九餘七百八得次沒

二十四氣損益率

盈縮數

冬至 益八百九十六

盈空

小寒 益三百九十八

盈八百九十

大寒 益四百

盈千二百九十四

立春 益二百二十

盈千六百九十四

啓蟄 益三百四十

盈千九百二十二

雨水 益四百五十

盈二千二百六十三

春分 損五百

盈二千七百一十三

清明 損四百五十五

盈二千二百一十三

穀雨 損三百五十五

盈千七百五十八

立夏

損五百五十五

盈千四百三

小滿

損八百四十八

盈八百四十八

芒種

益七百三十九

縮初

夏至

益六百二十六

縮七百三十九

小暑

益四百五十六

縮千三百六十五

大暑

益二百八十八

縮千八百二十一

立秋

益四十

縮二千一百九

處暑

益三百四十二

縮二千一百四十九

白露

益四百五十五

縮二千四百九十一

秋分

損六百八十二

縮二千九百四十六

寒露

損六百二十五

縮二千二百六十四

霜降

損五百七十

縮千六百三十九

立冬

損五百一十三

縮千六十九

小雪

損四百五十六

縮五百五十六

大雪

損百

縮百

以平朔弦望入氣日筭乘損益率如十五得一以損益

盈縮數為定盈縮分凡不盡半法已上亦從一以歷法
乘朔積日滿歷周去之餘如歷法得一為日命日筭外
得天正平朔夜半入歷日及餘次日加一累而裁之若
以萬四千四百八十四乘平朔小餘如六千五百三而
一不盡為小分以加夜半入歷日加之滿歷日及餘去
之得平朔加時所入加歷日七餘萬一千八十四小分
三千九百九十五命如前得上弦又加得望下弦及後
朔

歷日

行分

損益率

盈縮積分

一日

九千九百九

益三百九十二

盈初

二日

九千八百一十

益三百四十七

盈

二千一百四十四萬
一千二百二十六

三日

九千六百九十五

益二百九十五

盈

二千一百三十九萬
四千八百五十八

四日

九千五百六十三

益二百三十六

盈

二千九百九十五萬
二千八百四

五日

九千四百一十四

益百六十九

盈

三千六百七十九萬
三千九百五十

六日

九千二百六十六

益百三

盈

四十一百六十九萬
七千二百七

七日

九千一百一十八

益三十六

盈

四千四百六十七萬
三千五百七十五

八日	八千九百五十三	損三十八	盈 <small>四千五百七十二萬九千五十五</small>
九日	八千七百八十八	損百一十二	盈 <small>四千四百六十三萬六千五百五十七</small>
十日	八千六百四十	損百七十八	盈 <small>四千一百三十九萬八千六十八</small>
十一日	八千五百八	損二百三十八	盈 <small>三千六百三十二萬四千六百九十二</small>
十二日	八千三百九十二	損二百九十八	盈 <small>二千九百三十五萬四千五百二十八</small>
十三日	八千二百七十七	損三百四十一	盈 <small>二千九十六萬五千六百六十</small>
十四日	八千一百七十八	損三百八十六	盈 <small>一千一百八萬一千一百六</small>
十五日	八千二百一十一	盈三百七十一	縮 <small>九萬一千四百三十三</small>

十六日

八千三百一十

益三百二十六

縮

千八百三十三萬四千四

十七日

八千四百二十五

益二百一十五

縮

二千二十八萬九千三百七十二

十八日

八千五百五十五

益二百一十六

縮

二千八百二十三萬九千五十

十九日

八千六百八十九

益百五十六

縮

三千四百四十九萬一千九百三十六

二十日

八千八百三十七

益九十

縮

三千九百萬八千三十

二十一日

八千九百八十六

益二十三

縮

四千一百六十一萬九千二百三十五

二十二日

九千一百五十一

損五十一

縮

四千二百二十八萬二千五百四十七

二十三日

九千二百九十九

損一百一十八

縮

四千七百九萬九千八百五十七

二十四日 九千四百四十七

損百八十四

縮三千七百三十九萬
二千二百七十九

二十五日 九千五百七十八

損二百四十三

縮三千二百五十萬
九千八百一十四

二十六日 九千七百一十

損三百二

縮二千五百二萬三
千五百六十二

二十七日 九千八百九

損三百四十七

縮千六百二十九萬
五千五百一十八

二十八日 九千八百九十一

損三百八十三

縮六百二十二萬
九千八百八十

歷行分與次日相減為行差後多為進後少為退減去

行分六百七十六為差法各置平朔弦望加時入歷日

餘乘所入日損益率以損益其下積分差法除為定盈

縮積分置平朔弦望小餘各以入氣積分盈加縮減之
以入歷積分盈減縮加之滿若不足進退日法皆為定
大小餘命日甲子筭外以歲分乘年為積分滿周分去
之餘如度法得一為度命以虛六經斗去分得冬至日
度及分以冬至去朔日筭及分減之得天正平朔前夜

半日度及分

以小分法十四約度分為行分凡小分滿法成行分行分滿法成度若注歷又以二

十六約行分月星準此斗分百七十七小分七半

累加一度得次日以行分法

乘朔望定小餘以九百二十九除為度分又以十四約

為行分以加夜半度為朔望加時日度定朔加時日月
同度望則因加日度百八十二行分四百二十六小分
十太以夜半入歷日餘乘行差滿歷法得一以進加退
減歷行分為行定分以朔定小餘乘之滿日法得一為
行分以減加時月度為朔望夜半月度求次日加月行
定分累之

歲星率三百七十七萬五千二十三 終日三百九十
八行分五百九十六小分七 平見入冬至初日減行

分五千四百一十一自後日損所減百二十分立春初
日增所加六十分春分均加四日清明畢穀雨均加五
日立夏畢大暑均加六日立秋初日加四千八十分乃
日損所加六十七分入寒露日增所減百一十七分入
小雪畢大雪均減八日初見順日行百七十一分日益
遲一分百一十四日行十九度二百九分而留二十六
日乃退日九十七分八十四日退十二度三十六分又
留二十五日五百九十六分小分七

凡五星留日有分者以初定見日分

加之若滿行分法乃順初日行六十分日益疾一分百
去之又增一日

一十四日行十九度四百三十七分而伏

熒惑率七百三十八萬一千二百二十三終日七百

七十九行分六百二十六小分三平見入冬至初日

減萬六千三百五十四分乃日損所減五百四十五分

入大寒日增所加四百二十六分入雨水後均加二十

九日立夏初日加萬九千三百九十二分乃日損所加

二百一十三分入立秋初依平入處暑日增所減百八

十四分入小雪後均減二十五日初見入冬至初率二百四十一日行百六十三度自後二日損日度各一百二十八日率百七十七日行九十九度畢百六十一日又三日損一盡百八十二日率百七十日行九十二度畢百八十八日乃三日益一盡二百二十七日率百八十三日行百五度又二日益一盡二百四十九日率百九十四日行百一十六度又每日益一盡二百一十日率二百五十五日行百七十七度畢三百三十七日

乃二日損一盡大雪復初見入小雪後三日去日率一
入雨水畢立夏均去日率二十自後三日減所去一日
畢小暑依平為定日率若入處暑畢秋分皆去度率六
各依冬至後日數而損益之又依所入之氣以減之為
前疾日度率若初行入大寒畢大暑皆差行日益遲一
分其餘皆平行若入白露畢秋分初遲日行半度四十
日行二十度

即去日率四十度率二十別為半度之行
訖然後求平行分續之以行分法乘度定

率如日定率而一為平行分不盡為小分求差
行者減日率一又半之如平行分為初日行分各盡其

日度而遲初日行三百二十六分日益遲一分半六十

日行二十五度五分

其前疾去度六者行三十一度五分此遲初日加六十七分小分六

十分之三十六

而留十三日

前疾去日者分日於二留奇從後留

乃退日百九十

二分六十日退十七度二十八分又留十二日六百二

十六分小分三又順後遲初日行二百三十八分日益

疾一分半六十日行二十五度三十五分

此遲在立秋至秋分者加

六度行三十一度三十五分此遲初日加行分六十七小分六十分之三十一

而後疾入冬至

初率二百一十四日行百三十六度乃每日損一盡三

十七日率百七十七日行九十九度又二日損一盡五
十七日率百六十七日行八十九度畢七十九日又三
日益一盡百三十日率百八十四日行百六度又二日
益一盡百四十四日率百九十一日行百一十三度又
每日益一盡百九十日率二百三十七日行百五十九
度又每日益一盡二百日率二百五十七日行百七十
九度又每日益一盡二百一十日率二百六十七日行
百八十九度畢二百五十九日乃二日損一畢大雪復

初後遲加六度者此後疾去度率六為定各依冬至後日數而損益之為後疾日度率若入立夏畢夏至日行半度盡六十日行三十度若入小暑畢大暑盡四十日

行二十度

皆去日度率別為半度之行訖然後求平行分續之

各盡其日度而伏

鎮星率三百五十七萬八千二百四十六 終日三百

七十八行分六十一 平見入冬至初日減四千八百

一十四分乃日增所減七十九分入小寒均減九日乃

每氣損所減一日入夏至初日均減二日自後十日損

所減一日小暑五日外依平入大暑日增所加百八十分入處暑均加九日入白露初日加六千二分乃日損所加百三十三分入霜降日增所減七十九分初見順日行六十分八十三日行七度二百四十八分而留三十八日乃退日四十一分百日退六度四十四分又留三十七日六十一分乃順日行六十分八十三日行七度二百四十八分而伏

太白率五百五十二萬六千二百 終日五百八十三

行分六百二十小分八 晨見伏三百二十七日行分
六百二十小分八 夕見伏二百五十六日 晨平見
入冬至依平入小寒日增所加六十六分入立春畢立
夏均加三日小滿初日加千九百六十四分乃日損所
加六十分入夏至依平入小暑日增所減六十分入立
秋畢立冬均減三日小雪初日減千九百六十四分乃
日損所減六十六分初見乃退日半度十日退五度而
留九日乃順遲差行日益疾八分四十日行三十度入

大雪畢小滿者依此入芒種十日減一度入小暑畢霜

降均減三度入立冬十日損所減一度畢小雪皆為定

度

以行分法乘定度四十除為平行分又
以四乘三十九以減平行為初日行分

平行日一度

十五日行十五度入小寒十日益日度各一入雨水後

皆二十一日行二十一度入春分後十日減一畢立夏

依平入小滿後六日減一畢立秋日度皆盡無平行入

霜降後四日加一畢大雪依平疾百七十日行二百四

度

前順遞減度者計所減
之數以益此度為定

而晨伏夕平見入冬至日增

所減百分入啓蟄畢春分均減九日清明初日減五千九百八十六分乃日損所減百分入芒種依平入夏至日增所加百分入處暑畢秋分均加九日寒露初日加五千九百八十六分乃日損所減百分入大雪依平初見順疾百七十日行二百四度入冬至畢立夏者依此入小滿六日加一度入夏至畢小暑均加五度入大暑三日減一度入立秋畢大雪依平從白露畢春分皆差行日益疾一分半以一分半乘百六十九而半之以加

平行為初日行分入清明畢於處暑皆平行乃平行日
一度十五日行十五度入冬至後十日減日度各一入
啓蟄畢芒種皆九日行九度入夏至後五日益一入大
暑依平入立秋後六日加一畢秋分二十五日行二十
五度入寒露六日減一入大雪依平順遲日益遲八分
四十日行三十度

前加度者此
依數減之

又留九日乃退日半度

十日退五度而夕伏

辰星率百九萬六千六百八十三 終日百一十五行

分五百九十四小分七 晨見伏六十三日行分五百

九十四小分七 夕見伏五十二日 晨平見入冬至

均減四日入小寒依平入立春後均減三日入雨水畢

立夏應見不見

其在啓蟄立夏氣內去日十八度外三十六度內晨有木火土金一星者亦見

入小滿依平入霜降畢立冬均加一日入小雪至大雪

十二日依平若在大雪十三日後日增所減一日初見

留六日順遲日行百六十九分入大寒畢啓蟄無此遲

行乃平行日一度十日行十度入大寒後二日去日度

各一畢於二十日日度俱盡無此平行疾日行一度六

百九分十日行十九度六分

前無遲行者此疾日減二百三分十日行十六度四

分而晨伏夕平見入冬至後依平入穀雨畢芒種均減

二日入夏至依平入立秋畢霜降應見不見

其在立秋霜降氣內

夕有星去日如前者亦見

入立冬畢大雪依平初見順疾日行一度

六百九分十日行十九度六分若入小暑畢處暑日減

二百三分乃平行日一度十日行十度入大暑後二日

去日及度各一畢於二十日日度俱盡無此平行遲日

行百六十九分

若疾減二百三分者即不須此遲行

又留六日七分而夕

伏

各以星率去歲積分餘反以減其率餘如度法得一為日得冬至後晨平見日及分以冬至去朔日筭及分加之起天正依月大小計之命日筭外得所在日月金水各以晨見伏日及分加之得夕平見各以其星初日所加減之分計後日損益之數以損益之訖乃以加減平見為定見其加減分皆滿行分法為日以定見去朔日

及分加其朔前夜半日度又以星初見去日度歲星十四太白十一熒惑鎮星辰星皆十七晨減夕加之得初見宿度求次日各加一日所行度及分熒惑太白有小分者各以日率為母

其行有並疾遲者副置一日行分各以其差疾並遲損乃加之留

者因前退則依減伏不注度順行出斗去其分退行入斗先加分訖皆以二十六約行分為度分

交會法千二百七十四萬一千二百五十八分 交分法
六百三十七萬六百二十九分 朔差百八萬五千四百

九十四二分 望分六百九十一萬三千三百五十

交限五百八十二萬七千八百五十五分 望差五

十四萬二千七百四十七分 外限六百七十六萬

七百八十二九分 中限千二百三十五萬一千二十

五八分 內限千二百一十九萬一千四百五十八七

分

以朔差乘積月滿交會法去之餘得天正月朔入平交
分求望以望分加之求次月以朔差加之其朔望入大

雪畢冬至依平入小寒日加氣差千六百五十分入驚
蟄畢清明均加七萬六千一百分自後日損所加千六
百五十分入芒種畢夏至依平加之滿法去之

若朔交
入小寒

畢雨水及立夏畢小滿值盈二時已下皆半氣差加之
二時已上則否如望差已下外限已上有星伏木土去
見十日外火去見四十日外金晨伏去
見二十二日外有一星者不加氣差入小暑後日增

所減千二百分入白露畢霜降均減九萬五千八百二
十五分立冬初日減六萬三千三百分自後日損所減
二千一百一十分減若不足加法乃減之餘為定交分

朔入交分如交限內限已上交分
中限已下有星伏如前者不減

不滿交分法者為在

外道滿去之餘為在內道如望差已下為去先交分交

限已上以減交分餘為去後交分皆三日法約為時數

望則月蝕朔在內道則日蝕

雖在外道去交近亦蝕
在內道去交遠亦不蝕置

蝕望定小餘入歷一日減二百八十若十五日即加之

十四日加五百五十若二十八日即減之餘日皆盈加

縮減二百八十為月蝕定餘十二乘之時法而一命子

半筭外不盡得月蝕加時約定小餘如夜漏半已下者

退日筭上置蝕朔定小餘入歷一日即減二百八十若十五日即加之十四日加五百五十若二十八日即減之為定後不入四時加減之限其內道春去交四時已上入歷盈加縮減二百八十夏盈加縮減二百八十秋去交十一時已下惟盈加二百八十已上者盈加五百五十縮加二百八十冬去交五時已下惟盈加二百八十皆為定餘十二乘之時法而一命子半筭外不盡為時餘副之仲辰半前以副減法為差率半後退半辰以

法加餘以副為差率季辰半前以法加副為差率半後
退半辰以法加餘倍法加副為差率孟辰半前三因其
法以副減之餘為差率半後退半辰以法加餘又以法
加副乃三因其法以副減之為差率又置去交時數三
已下加三六已下加二九已下加一九已上依數十二
已上從十二

若季辰半後孟辰半前去交六時已上者皆從其六六時已下依數不加

皆乘

差率十四除為時差子午半後以加時餘卯酉半後以

減時餘加之滿若不足進退時法

孟謂寅巳申仲謂午卯酉午季謂辰未戌

得日蝕加時望去交分冬先後交皆去二時春先交秋
後交去半時春後交秋先交去二時夏則依定不足去
者既乃以三萬六千一百八十三為法而一以減十五
餘為月蝕分朔去交在內道五月朔加時在南方先交
十三時外六月朔後交十三時外者不蝕啓蟄畢清明
先交十三時外值縮加時在未西處暑畢寒露後交十
三時外值盈加時在巳東皆不蝕交在外道先後去交
一時內者皆蝕若二時內及先交值盈後交值縮二時

外者亦蝕夏去交二時內加時在南方者亦蝕若去分至十二時內去交六時內者亦蝕若去春分三日內後交二時秋分三日內先交二時內者亦蝕諸去交三時內有星伏土木去見十日外火去見四十日外金晨伏去見二十二日外有一星者不蝕各置去交分秋分後畢立春均減二十二萬八百分啓蟄初日畢芒種日損所減千八百一十分夏至後畢白露日增所減二千四百分以減去交分餘為不蝕分不足減反相減為不蝕

分亦以減望差為定法後交值縮者直以望差為定法
其不蝕分大寒畢立春後交五時外皆去一時時差值
減者先交減之後交加之時差值加者先交加之後交
減之不足減者皆既十五乘之定法而一以減十五餘
為日蝕分置日月蝕分四已下因增二五已下因增三
六已上因增五各為刻率副之以乘所入歷損益率四
千五十七為法而一值盈反其損益值縮依其損益皆
損益其副為定用刻乃六乘之十而一以減蝕甚辰刻

為虧初又四乘之十而一以加食甚辰刻為復滿

唐書卷二十五